

# Vun driweriwer

---

erscheint auf [www.lenauheim.de](http://www.lenauheim.de)

monatliche  
Erscheinung

Oktober 2014

von Helen Alba

## Tschokoladi, e Genuß for Kiner

In friehriche Zeite war Tschokoladi e Seltenheit. Die Kiner ware froh un glücklich, wann se e Stickl Knuppezucker kriet han. Wie ich kleen war, in seller Zeit hat mer schun meh vum Tschokoladi gewisst, ne ach zu kaafe kriet. Wie dann mei Kinner noh Tschokoladi gegammert han, do hat mer schun dernoh Schlang stehn oder sich de „schwarz“ verschaffe misse. Aus dere „Kandia“-Fabrik is der gstohl un verkaaft gin, in seller Zeit hat mer ufm Otschko ach de serwische Eurokrem ergattre kenne.

Un heizutach, ja do is jo alles voller Siessichkeite. Anfang vun Bombons, Waffle, Tafle, Schachtle – alli Sorte, die mer sich nor winsche kann, gin in de Gschäfte offeriert. For die Kiner gits spezielle Tschokoladi mit vill Milchcreme. Die greschti Anziehungskraft han die Iwerraschungsaiger. Es is nit vill Tschokoladi drin, in der Mitt noch e kleenes Spillsach. De Preis is dann ach demnoh!

Unser kleene Enkel is jetz drei Jahr alt un verpicht uf Tschokoladi. Doch die Eltre gin stark druf owacht, dass er jo seltener zu dem Genuss kummt. Weil es Kind soll jo gesund ernährt gin un ke Speck ansetze. Mir tut der Kleen manchmol stark leed. Doch ich traue mich nit, hinerwärts ne mit Siessichkeite zu verwehne. Des han ich eemol gemacht. Mir sin langscht e Supermarkt gang un der Kleen hat rum gezerzt un gebettelt, er will e Aij. Ich hans nit iwers Herz bringe kenne, sin ins Geschäft mitm Kind un han e Iwerraschungsaig kaaft. Drauss han mer uns uf e Bank gsitzt un er hat de Tschokoladi verdriekt. Wie mer hem kumm sin, hat er der Mami e Pussi gin, die hat gschnuppert un gfroot: „Hat die Oma der amend Tschokoladi kaaft?“

Do owets hucke mer alli im Wohnzimmer, der Kleen verspillt sich, während mir Großi Fernseh schaue. Ich sin meischt mit de Aue meh ufm Kind wie am Bildschirm. Do sitzt er ufmol uf seim Schamel, bickt sich, macht mit der Hand so, wie wann er was vum Teppich holle tät, fiehrt die Hand zum Maul, leckt die Fingerche ab un schnalzt geniesslich mit der Zung. Nohdem er des phaarmol wiederholt hat, froo ich: „Was machst dann, mei Schatz?“ „Oma, ich ess doch Tschokoladi!“ Ich sin nit weiter druf ingang, han mer mei Teel gedenkt. Doch was kann mer mache, wann die Eltre was „geger Tschokoladi han!“